



Luis JAUREGIALTZO | ARGAZKI PRESS



IKUSMIRA

BETI ZARAMATE ALDEAN, HODEI

Egunak, orduak eta segunduak kontatzen ditu zure jendeak Hodei. Denbora denbora da, eta ez du balio hutsune batek sortzen duen minaren larria neurtzeko. Baina denbora kontatzen dute, mina ezin dutelako neurtu. Zurekin pasatako uneek betetzen dituzte zure hutsuneak; zurekin bizitakoen oroitzapenak betetzen dute zure aulki hutsa. Beti zaramate aldean, erantzi ezin den motxila baita zure faltak sortzen dien egozina. Presentzia ez baita presente dagoenaren itzala, ez dagoena aldean daramazunaren sentsazio epela baizik. amagoia.mujika@gaur8.info

Adur erreketan igeri

Maider Iantzi

Ahotsak gero eta urrunago, ulergaitzago, ametsekin nahasten dira. Eta burua, ezin tente eutsi, atzera doa. Ahoa irekita, adurra bere bidea egiten hasi da, gorbata bustiz. Erreka bat jaio da trajean.

Kamera abil batek bete-betean harrrapatu du begiak zabaltzeko eta lehenbiziko nahasmen horretan –non nago? zein egun da?–, eta geroko disimuluan ere bai.

Ingurura begiratu ea inork ikusi duen, lepo mindua zuzendu, mikrofonoan dagoenaren hitzak aditzearen itxurak egin... Ze barregarria diputa-

tuaren trantzea! Eta politikari atrakatzaleei buruzko txisteak...

Ahoa zabal-zabalik, ozen egiten du irri 24 urtez Pujol familiaren lapurretak ikertzen ibili den pertsonak –zergatik atera diren argitara hain berandu galderari hala erantzun dio: «Bazen garaia!»–. Irri bitxi horietakoa du, kutsakorra, eta guk ere ajarika bukatu dugu, gizonak irri noiz egingo, gu ere bestara batzeko. Eta ongi pasatu dut, baina erran behar dut aspertu naizela egunero iruzurti esku luzeak ikusten, eurekin gosaltzeko, bazkaldu eta afaltzeko.

Umorea egiten da haiekin, baina egiatan, umore gehiago egiten dute

haiek gurekin. Eginak egin, eta argitaratuak argitaratu, ez baitaie deus gertatzen. Barkamena eskatu eta eskuak sakela beroetan sartu.

«Barkatu», erran du Mariano Rajoyk ustelkeria onartuz. Zurbil, ahituta, irri gutti presidente espainiarraren aurpegian, gainbeheraren ispilu, leherketaren beldur. Ongi etorria eztanda, eta instituzioen ordezkariak beren onena emateko duten ardura oroitzeko. Baita gurean ere, adur erreketan igeri egitera ohituta, beren ametsetik ernatu eta gure ahotsa aditzea eskatzen ahal diegun guttienekoa dela atzentzen zaigulako. •